

佛说阿遯达经 1 卷

No. 141 [No. 125(51.9), 142-143]

佛说阿遯达经

宋天竺三藏求那跋陀罗译

闻如是：

佛在舍卫国，告诸比丘：「皆听我所言致难，父母生子养育哺乳，长大欲令见日月光，父母以天下万物示子，欲令知善恶。诸比丘！如是子以一肩负父，复以一肩负母，至寿竟乃止，复以天珍宝、明月珠、玉璧、琉璃、珊瑚，自生禽兽白珠，皆以着身上，尚未足报偿父母恩。父母喜杀生，子能谏止父母，令不复杀生；父母有恶心，子常谏止，令常念善无有恶心；父母愚痴少智不知经道，以佛经告之；父母贪狼嫉妬，子从顺谏之；父母不知善恶，子稍以顺告之。诸比丘！子当如是。为人作子，衣服欲好于父母，食欲甘于父母，语欲高父母上，至死后当入地狱中。为人作子，当孝顺事父母，持行如是者，死当生天上。」诸比丘皆稽首，俱闻善教。

佛言：「有大贤者优婆塞字遯达，为子取妇，妇字玉耶。玉耶大豪富家女，不以姑妯之礼事遯达，亦不敬其夫婿积数年。遯达亦贤者优婆塞，不言不语，到佛所自责：『我为子取妇，国中豪富家子，心大欢喜。今事我数年，懦慢自恣不以妇礼，愿佛明日自屈到我家。』佛默然不应，默然不应者旦日欲往。明日佛到遯达家，其妇不出，佛以神化之，心喜，乃出见佛，前为佛作礼。佛言：『汝为人作妇，用何事夫婿？』玉耶言：『当以身事夫。』佛言：『妇人事夫有三恶四善。何等为三恶？一恶者，如与惰人共居不欲作事，骂詈至暮，嗜美好鬪。二恶者，如与怨家共居，不持一心向夫，不愿夫善，不愿夫成就，当愿夫死。三恶者，如与偷盗共居，不惜夫物，但念欺夫，常欲自好，不顺子孙，但念淫泆。如是死者，展转恶道中无有出时，是为三恶。何等为四善？一善者，妇见夫从外来，当如母见子，夫有急缓，常

欲身代之。二善者，妇事夫当如弟见兄，上下相承事，夫恶不以为恶，不念淫泆常随夫语。三善者，妇事夫当如朋友，相见辄相念，夫从他方来，当如见父兄，心中欢喜和颜向之，妇持心当如是。四善者，妇事夫当如婢，夫大骂亦不以为恶，捶击亦不以为剧，走使亦不以为劳苦，夫虽恶，常念事善，当顾子孙，如是死者常生天上，亦于天上饶侍者，好衣、珍宝常在身上。』佛言：『三恶四善，汝欲持何所事夫？』玉耶言：『妇人事夫不可用三恶，四善者可与共居，从今以去，请如婢事大夫子。』玉耶即膝行承事邀达，以夫妇之礼事其婿。」

## 佛说阿速达经

---

【经文信息】大正藏第 02 册 No. 0141 佛说阿速达经

【版本记录】CBETA 电子佛典 Rev. 1.11 (Big5)，完成日期：2010/11/03

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供 / 张文明大德二校，维习安大德提供之高丽藏 CD 经文，北美某大德提供，法雨道场提供新式标点

【其他事项】本数据库可自由免费流通，详细内容请参阅【中华电子佛典协会数据库版权宣告】

---